

Minister Dangui Oduber ta anuncia cu por fin AruBIG ta bira un realidad

ORANJESTAD (AAN): E Ordenanza Nacional profesionnan den cuidu di salud, esta e Landsverordening beroepen in de gezondheidszorg of e asina yama 'AruBIG' (AB 2014 no. 73) y tambe e Ordenanza Nacional calidad den cuidu di salud, esta e Landsverordening kwaliteit in de gezondheidszorg (AB 2014 no. 74) ta leyman cu ta traha como un solo sistema pa asina garantiza e calidad di cuidu di tanto profesionnan como e instancianan den ramo di cuidu.

E AruBIG ta un ley macro ('een raamwet') cual su implementacion mester tuma lugar den fase y a cuminsa caba riba 15 di augustus 2017 (AB 2017 no. 54). Cu e Decreto Nacional aki e articulo 44 di AruBIG tambe a keda anula. Esaki hustamente tawata e articulo cu mester a percura pa un transicion y alternativanan mientras cu e Kwaliteitsinstituut no a wordo institui ainda. Cu e anulacion di e articulo aki gobierno a keda para bou di un presion enorme pa institui e Kwaliteitsinstituut aki mas pronto cu ta posibel.

Legalmente e Kwaliteitsinstituut a wordo crea caba segun articulo 14 di e Ordenanza Nacional calidad den cuidu di salud (Landsverordening kwaliteit in de gezondheidszorg). E articulo 7 inciso 2 punto a di e AruBIG a keda elabora den e Landsbesluit AB 2017 no. 54 den cual e registro a wordo reconoci. Segun e Decreto aki ta trata e registro Hulandes BIG y tambe e sistema CanMeds. E ultimo aki sin embargo ta un error, pasobra e sistema CanMeds no ta un registro. E Landsbesluit a wordo implementa sin cu e infraestructura pa e registro a wordo estableci. Pa e motibo ey e Landsbesluit



it aki a crea un cas bashi. Mas ainda pasobra 40% di e specialistanan e ora no ta autorisa conforme e articulo aki y pesey semper mester sigui e excepcion pa medio di un permiso ('een ministeriële beschikking') pa wordo permiti pa traha, mientras tanto cu e unico alternativa pa e fase transitorio di articulo 44 de e AruBIG a wordo anula.

Den poco palabra mester a:

a. Elabora riba e investigacion y apunta e organonan di acreditacion y tambe e exigencianan di estudio ('opleidingseisen') y pa medio di esaki hustamente stimula e specialismonan mas deseabel for di nos region; y
b. Duna un estimulo na por sigui specialisa y e regreso di nos yunan di tera cu a bai studia den region y a specialisa.

E Ministerio di Turismo, Salud y Deporte a drenta na aña 2018 den dialogo cu e sector di cuidu pa asina cuminsa traha ariba organonan di acreditacion cu lo wordo apunta, mnetienendo e calidad di cuidu como punto di salida. Despues di casi un aña caminda diferente reunionnan a ser teni cu diferente profesionnan den cuidu. For di inicio como Minister mi a pone bon cla cu nos lo bay sondea mas posibilidad pa bini cu specialistanan pa amplia nos cuidu aki na Aruba y mas aun cu e meta

pa stimula nos yunan di tera pa regresa nan pais cu un specialismo y duna oportunidad pa specialisa den region.

Ultimo reunion a ser teni na februari 2019, na cual mi ta referi na e notulen. Ademá a cuminsa cu e investigacion acerca di e calidad y exigencianan di estudio di e universidadnan den region. Finalmente a cuminsa cu e preparacionnan pa e independisacion di e Kwaliteitsinstituut.

E Landsbesluit aki hunto cu e implementacion di e Kwaliteitsinstituut como un seccion independiente tawata e prome pasonan den e sistema aki cual ta muestra como lo siguiente:

i. E organonan di acreditacion ta test e calidad di estudio y e curriculum. E organonan di acreditacion cu a wordo selecta ta conforme e tratado MULTRA y ta situa den e paisnan cual ta conoci cu e Yunan di tera a bai studia y goza di nan specialisacion. E Tratado MULTRA ta percura pa e reconocimiento internacional di diploma. Manera ta conoci den cuidu di salud tin e tendencia pa globalisacion, particularmente pa motibo di e escases. Mester remarca cu e Landsbesluit ta percura pa specialismonan. Mester por papia di e autorisacion completo di e profesional (bevoegdheid in volle omvang van de zorgprofessional). E preocupacion expresa cu pesey ta dokternan

general aki por establece nan mes como dokternan di cas ta pues un ekibocacion. Un dokter di cas ta un specialismo y e dokternan general cu a studia na Latino America —e medico cirujano— mester specialisa como dokter di cas prome cu e por cuminsa traha como tal.ii. E implementacion di e Kwaliteitsinstituut. Manera indica a cuminsa cu concipia e Ordenanza di apoderacion (machtigingsverordening) y elabora un plan di organisacion pa e Kwaliteitsinstituut cu propio personalidad legal. A base di e consejo di DWJZ a implementa e instituto aki caba riba 15 di juli 2020 den anticipacion di e Ordenanza aki como commissionerario encarga pa logra esaki y tambe como seccion independiente di DVG. Pesey por fin por traha riba un ehecucion corecto di articulo 7 AruBIG. E Kwaliteitsinstituut por conecta cu e standanman existente y lo por formalisa y garantiza e normanan pa e asina yama 'herregistratie'. Di e manera aki por evita cu den practica e tin 'scheefgroei'.

iii. E Landsbesluit tocante e exigencianan di estudio (de opleidingseisen) cual actualmente tambe ta referi na e universidadnan den cual e contenido di e estudio pa loka ta e competencianan y pesey e exigencianan di capacidad mester ta comparabel cu e sistema Hulandes/CanMeds. Por lo tanto ta solamente algun universidadnan a wordo selecta den e paisnan di Latino America.

Pa resumi: e Meta di e Landsbesluit acreditatieorganen ta pa soluciona e problematica di e autorisacion pa por traha como medico of profesional di cuidu y duna nos yiu di tera cu ta studia den nettamente e paisnan aki e oportuni-

dad y seguridad cu nan por specialisa den region na un universidad cu ta wordo reconoci pa un organo di acreditacion nombra den e Landsbesluit aki.

Den practica a muestra te awor:

- Un gran parti di e mediconan no ta cumpli cu e exigencianan poni den ley;
- E regla pa duna un permiso (vergunning) pa un "tekort" (escasez) a bira un regla na lugar di un excepcion;
- No tin posibilidad pa reconoce e diferente specialismo adecuadamente;

- Historicamente Aruba no por depende di Hulanda so pa haya profesionnan bin traha den cuidu (desde añanan 30 te awor);
- Expertonan ta premira cu entre 2030-2040 lo tin un escasez di profesionnan na Hulanda y pesey Aruba no por keda depende di Hulanda solamente;

- Mundialmente lo ta bay tin escasez door di e 'dubbele vergrijzing' segun W.H.O.;
- Tur aña DVG ta procesa 60-70 vergunning pa medico cu ta representa un 40% di e cuidu y esaki ta solamente pa dokter. Pa tur profesion den cuidu ta muestra e mesun tendencia;

- E mediconan cu permiso ta traha pa nos pais pero nunca ta wordo reconoci pa su labor y calidad di profesionalismo. E Landsbesluit ta pone un fin na e practica inhusto y indesea aki pa gobierno, pa e profesionnan y pa tur pashent y e pueblo henter.

E Landsverordening beroepen in de gezondheidszorg (AruBIG) lo reconoce e organonan di acreditacion di e diferente paisnan ya menciona. Reconoce e estudio di otro paisnan ya caba ta un tendencia internacional manera por mira den tratadonan.